

賚香榭詩詞稿

國立北平圖書館惠存

著者贈





影 近 者 作

自叙

中日事起余避兵桂林同時無錫國專學校亦全部抵此築舍授課
余以暇時得與該校生徒談論經史兼及詞章之學兩窗月榭酌酒
賦詩遣旅懷也甲申七月桂垣告警復隨該校南遷由陽朔荔浦而
蒙山金秀以至北流登高涉險皆仗諸生扶持之力每遇山水佳勝
處輒信口謳吟不計工拙門人輩阿私所好爲錄而存之日久成帙
丁亥秋湘潭郭湘取視舊所錄者已蠹蝕過半亟欲付梓余曰嘻惡
乎可憶吾年四十曾在蘇垣刊印春雨樓集五種分贈知交越十年
偶自翻閱汗出如瀋幸經劫火爲余浣去舊污印本當已絕跡今以
亂離之作決無雅正之音且年屆古稀稍和愧恥更不應留此臧私
污人眼目湘曰吾輩刊之吾輩讀之以免抄寫之煩耳非欲強先生
出而問世也余感其雅意之殷爲述其概略爲此

江甯俞鍾彥

敘

寶香樹詩詞集都爲一卷業師秣陵俞瑞徵先生十年兵火萬里奔馳之作也夫龍門史才大肆於遊歸之日子山賦手更成於年老之時況興亡之感托於謳吟貞介之心流於楮墨則楊柳曉風芙蓉初日又爲凡響矣時先生講學無錫國專同門輩屢請刊刻近作以供研讀先生固却不允明年秋九月初六日爲先生七十壽辰邵陽會長卿株州鄧式山陽朔黎子夫句容杜克諸同門先後以書來謀所以壽之者因思聯文禮品販夫走卒習用之矣不敢以塵俗之禮汚先生特刊先生舊作爲先生壽而先生以七十之年敏事勛學乃類少壯他日年登耄耄已可預卜至居常闡揚國學誨人不倦其足以壽世者更無量也

門人郭湘敬撰

贊香榭詩稿

秣陵俞鍾彥

衡陽聞雁

去年雁南飛伴我來衡陽今年秋又至我尚滯湖湘雁來應笑我遠
遊忘故鄉羞與雁相見低首荒江旁

人乃不如雁自由翱翔雌雄各爲伍比翼同鴛鴦自我辭故里踽
踽而涼涼弔影同孤雁零落空自傷

雁來避嚴冬我來避戎羌嚴冬有時盡戎羌何時亡江南烽烟滿一
片腥與羶我如驚弓鳥倉皇復倉皇

裘敝愁霜雪囊空羞行裝此身如殺羽翹首羨雁行雁到衡陽止我
行方未央行行重行行怨道徂且長

菩提寺

行到菩提寺禪門鎮日閒雀飛疑落葉雲凍誤遙山風竹掃簷雪寒
梅隔水灣攜琴欲歸去稚子候柴關

答安農

劉琨吾老友最愛筆如椽小別不通問相逢又隔年祇緣詩律細贏得姓名傳笑我何爲者霜花兩鬢添

武昌寒食

江城寒食雨濛濛千里鄉心望眼空芳草天涯依舊綠海棠庭院可憐紅清譚漫洒傷時淚獨客眞如斷梗蓬誰悔用他無賴子等閒盡棄大江東

題李山人別業

離城十里已無塵始識山林氣味眞覓食游魚常傍岸忘機幽鳥愛窺人循牆穿土尋秋笋積澇成谿長白萍野叟知音邨酒賤不憂寂寞不嫌貧

別簷雀

客舍愛幽寂簷雀棲繁枝飛鳴繞窗外對我如言讎飼以果與粟翔

集盈堦墀晨昏以時至未飽終不離初猶窺戶牖繼且入屏幃飽啄
上樹杪馴習兩忘機而我不久住遠去西南陲我去爾莫來別爾心
傷悲人心好殘殺慈惠不可期勿貪數粒米慎防生命危

抵桂林與安農重見

南來十日九逢陰斗室徘徊費苦吟避亂經年依瘴嶺敲詩竟夜擁
孤衾仲宣樓外烽烟滿庾信江南感慨深難得故人相慰藉西窗話
雨酒頻斟

柳州

頭白無端作遠遊非關罪謫亦長流舟車飽看佳山水骨肉難忘舊
侶儔作客天涯傷倦鳥懷人日暮獨登樓投荒萬里緣何事慚愧當
年柳柳州

鍾子瑜被放作此慰之

鳳皇離其羣終不偶雞鶩忍饑飲寒泉百鳥不相顧根性自不凡窮

達亦有數一朝羽毛豐萬里青雲路所志在八表豈戀枯桐樹

遊桂林附郭諸山

曩見桂林秋色之粉本口雖贊譽心生疑以爲丹青妙手由心造山勢焉得如此奇今年避寇西南陲遠來桂嶺親見之張口木立心如癡始信我生眼界真卑卑舊遊湖山各名勝小巫大巫徒增嗤大抵江浙之山平遠勝此處獨愛石險巖忽然拔地動千刃矗立如塔如棟橈馬援鎮邊立銅柱五七雜峙爭雄姿又或醜怪如魍魎或如獅象如狻猊中有一峯高出衆欹側欲倒危乎危老松夭矯古柏秀牽纏倒掛藤蘿絲掩映離江城畔水如此畫境能無詩更來山下細探討剔蘚猜讀磨岩碑循徑環繞入洞穴中間開闢寬如墀鍾乳垂垂若冰柱盈尺盈丈殊參差或云此地在今昔本滄海海枯石爛尚有遺迹留今茲不可久留氣寒冽回首卻顧不肯離石乎石乎我心悲我心匪石石不知萬流衝激不可轉一任巖巖詢責心無虧石今歷劫

不少動惟我與汝相師資他年還鄉覓良伴路遠待叱愚公移

慈孝竹 有序

有夫死念遺孤而不嫁者至貧不能活乃攜子去幃而後夫

與此婦又先後病卒聞稚子哀聲感而賦此

老竹經冬褪新綠竹根笋又參差出斫竹編籬還護笋可憐笋在籬
邊哭朝也哭暮也哭無端哭倒編籬竹依然笋被旁人劬

廢圃

園蔬不得治蔓草任枯榮路僻無人到野禽相向鳴

白藤花

香風陣陣雨初乾一架銀藤玉蕊攢移入林園誇冷艷在山曾共野
花看

古意

含情寫新詩詩成腸斷絕淋漓落紙上一夜化碧血明月不解苦隨

意圓與缺人心不如月能經幾回別青青河畔草迢迢桂南道春向
故園新人在天邊老昔我遭喪亂會逐雁南飛雁已四度返征人猶
未歸

美人峯

不是望夫石娉婷亦可憐苔寒侵翠袖雲重暈香肩待月應嫌冷窺
人未肯眠料他會閱世心竅似規圓

感懷和歐陽革辛韻

干戈未靖敢鳴高萬種牢愁對濁醪夢醒燈殘推枕起滿天風雨夜
蕭騷

落日平沙起暮笳江天風急雁行斜漫摩髀肉猶能飯不掃匈奴莫
問家

殘菊

幾枝殘菊已伶仃一樹孤松伴石樞待曉寒蛩鳴太苦採香瘦蝶夢

難醒塞鴻弔影荻蘆飽河鯉吹風波浪腥十里荷花氣桂子一般秋色總飄零

中秋前一日與歐陽韋辛穿山玩月

南來已屆四中秋玉鏡何堪照白頭擊楫中流應有意新亭對泣問何由豈無壯志同天運別有傷心抱杞憂如此江山如此夜獨憐隨伴作清遊

咏史

寶馬香車興未闌炎炎權勢共追攀馬嵬未到身猶在總說冰山是泰山

大隱

鐘鼎山林各有志不甘寂寞亦人情市朝不是藏身處欺世猶誇大隱名

送彭子湘返長沙

天涯送客淚滂沱直把驪歌當棹歌
嶽麓峯前新雨霽
灤江城上瘴雲多
羨君獨得山林趣
愧我難尋安樂窩
橘綠橙黃好風景
等閒四度客中過

顧梅麓由杭州以詩見寄次韻答之

曾約西冷共結廬
當年奢願付華胥
鄉愁入夢家山遠
世亂離羣舊雨疏
不釣浮名因遠禍
親逢浩劫勝觀書
穿雲我愧天邊雁
冒雪君騎湖上驢

彈丸河謁性因和尚墓

朝官不作作頭陀
無限興亡眼底過
那有彈丸歸地主
墓門羞對彈丸河

綺語

綺語難忘債不清
怕談風月惹愁生
此心未信成灰燼
又聽鶯鶯燕燕聲

諫果

纍纍諫果摘繁枝
邀客當筵細品之
能向尊前醒酒意
也宜茶後沁詩脾
不辭茹苦心猶勇
回到餘甘事已遲
幾許清芬留舌本
人間此味耐尋思

次革辛感興韻

會乘天馬掃妖星
莫話輪蹄厭遠征
世亂需才難袖手
功成長揖不求名
但憑弧矢非良策
不貫天人莫弄兵
直搗黃龍應有日
撫髀搔首意難平

冬至後二日衡山道中作

六出翻飛影蔽空
凍泉鳴咽起悲風
孤舟闌寂無人渡
斷岸依稀有路通
入塞飛鴻鐵欲絕
衝寒征馬氣猶雄
豈真磨鍊英豪處
定在冰天雪地中

山畫眉

拋卻黃金買鬥心，莫因眉嫵認馴禽。
在山愛作鈞轡語，一入彫籠無好音。

陳夫人善畫梅詩以贈之

淡寫幽窗橫幅圖，幾生修到伴林逋。
裁冰鏤雪清如許，還有纖塵半點無。

楊花

碧紗窗外散瓊英，青草池邊寄遠情。
日暖風和來復去，不輕盈處亦輕盈。

身輕意遠自飄飄，纔過粧樓又板橋。
寄語兒童休浪捉，讓他前路上雲霄。

乍辭芳樹寸心迷，飛到天階高復低。
飄泊總緣風雨惡，未應冷眼笑沾泥。

謾嗟身世太飄零，亦有天然妙性靈。
寧對清風舞迴雪，怕沾綠水化。

浮萍

與莫少仲遊陽朔

少仲憐我心憂忡邀遊陽朔開煩胸一葉扁舟不嫌小循流西去離
江通曉起推篷望山色如絲細雨飛濛濛不覺廢然發長嘆欲擴眼
界翻成空少仲攬衣大笑樂謂我終是田舍翁謂此機會最難得雨
景不與晴景同遙指諸峯忽隱現離奇變幻寧有窮巒頭架在濃雲
上山腹偶露青如蔥村舍人家隔烟語山寺不見聞寺鐘天公似解
遊人意爲我掉換晴雨風頃刻蔚藍天若洗萬象改觀氣更雄奇峯
插天翡翠綠落日照水燕支紅江山到此真奇絕四王畫稿難爲工
留連三日不忍去著屨時復尋幽穹少仲倦遊催返棹神魂猶在此

山中

題畫詩爲李崧老作

野寺隔山深山僧何處尋橫雲斷孤嶺清磬度寒林白髮天涯淚黃

花歲晚心江樓久不到乘興一登臨

秋日漫興三首

天邊孤鴻去又來江柳岸草被霜摧百憂安得不憔悴青燈夜雨獨
銜杯

採菊採菊愛芳顏何因舉頭見南山當年陶令嫌多事胡不歸來早
閉關

投林倦鳥棲復棲迢迢驛路西復西渡頭落日低復低罇前醉意迷
復迷

題畫馬

記得嘶風出玉關酬恩原爲寄天閑而今羈勒全拋去芳草斜陽任
往還

秋砧次金仲如均

水邊岸側聽聲聲百搗千敲意未平昨夜微霜侵遠夢今宵玩月動

離情灝江水冷魚先覺
衡嶽風高雁始驚
爲讀少陵石壕吏
累他兒女怨長征

偶成

已亡項羽八千衆
枉說田橫五百人
今日同床不同夢
翻憑世亂逞貪瞋

水到興安分派流
東西各別兩悠悠
不知流入灝江後
也解同源肯掉頭

若箇男兒想立功
潛潛淚眼望江東
而今猛士皆無賴
羞對飛雲唱大風

吠聲吠影總無因
如此囂囂那可親
成事不能能敗事
小金臺上養閒人

久聞號國最承恩
幾欲嚙兒事婦人
鷄犬隨他天上去
身無羽翼恨難伸

待時行樂養精神風動園林賞好春荷錨攜鋤辛苦意看花不是種
花人

兵家紀律不容寬閫內從來將將難惟有張巡解儒術誰教許遠亦
登壇

與青士論詩

有心總不及無心莫去拈鬚費苦吟人籟何如天籟好松風竹露自
成音

筆底有神憑夙慧胸中無物莫題詩清風明月無邊趣沅芷江籬絕
妙詞

讀碧山詞有感

窮塗恥賦工愁句垂老耽吟豔體詩別有傷心誰會得酒邊花外意
遲遲

利名

華萼爲利復求名到手眞無足重輕輸與隣翁知進退不成一事夢魂清

鬱輪袍

才名誰及輞川高一入朱門失舊操提起琵琶雙淚落祇今羞鼓鬱輪袍

舞馬明皇時天閑教舞馬兩京既陷祿山以爲妖也殺之

主公不盡習荒淫好尙由來各有心舞馬不知人事改折盤猶認舊君臨

重過張氏故宅

當年結構費心裁人事無常亦可哀華屋舊曾留客住園花今更向誰開

與李公話今昔事

畫棟茅簷一例居范睢張祿亦何殊天邊燕子歸來日猶認今吾郎

故吾

題畫詩

忍把丹青換斗升客窗風雨硯凝冰六千里外誰相識好與名山結

友朋

入桂峯巒畫不成自將餘墨寫詩情他年一舸歸來日百幅秋山送我行

江上口占

秋水盈盈如鏡平一雲水面寒風生吹起波瀾駭漁父漁父已慣江上情

一波未平一波起前浪後浪相催攢看他高湧看他落倦眼青山已厭看

張西樵邀賞舊藏銅器並出其拓本索題

君家彝鼎與刀泉古色斑斕五世傳我有奇珍人未識青山日月幾

何年

暮春偶成

問余何事淚潸潸傷別傷春傷暮年天降凶殃人不悔也傷人事也
傷天

侵曉過穿山見野薔薇盛開爲賦二律

殘春過盡雨初晴淺白深紅分外明不入園林推逸品恥隨蘅杜競
芳名曉風殘月醒初解野店溪橋夢也清攀我柔條嫌我刺閒花目
我意難平

也宜淺飾也濃妝開向田塍亦自傷不解送迎饒有致寧甘寂寞獨
嫌狂郊原雨過春猶靚蹊徑人歸風自香歲歲年年山下路爲誰搖
落爲誰芳

遣興

駭浪驚濤東海東輕舟載重亂流中勸君及早收篷腳從古傾船是

順風

白小魚

數罟入池垂古誠安心竭澤問何居河魴河鯉都烹盡災及灘江小

白魚

壬午七夕陳頌洛招遊畫舫卽席得光字

清灘倒影動星光雲剪輕羅月上妝北海尊前無俗韻于湖遊後此
清狂漫憑銀漢思前事欲趁天風到上方且莫當筵歌玉樹秦淮烟
水正茫茫

題費曉樓便面美人

乍覩雙成意也銷縱然無語亦含嬌驚鴻留得翩翩影花妬香腮柳
妬腰

銖衣窄窄費裁量風過如聞羅綺香何必重歌端正好祗應低唱意
難忘

莫嫌笑謔癡癡態卻有嬌柔煦煦溫底事泥人腸斷處滿天風月不留痕

題畫

一夕西風萬木飛楚江追遞隔烟霏荻蘆未老頭先白鴻雁來時人未歸

夏曆九月杪爲先慈忌日回憶三十五年前在京曾賦慈母一首以亂後舊稿散失爰補錄於此以誌哀思

當年游子夢依依欲報慈恩舊願違此日一官清俸薄鐙前猶累補朝衣

絕句

爲訪幽人迹攜筇過小莊到門偏不入池上看斜陽

五十君咏有序

江南陸師學堂創於清光緒丁酉止於宣統己酉凡十二年

中間四屆畢業同學者共四百五十人距今卅餘載星移物換死亡流落不可統計其存者殆如曙後星孤可勝慨歟茲就已故者擇出五十人各繫小詩一首名爲五十君咏就其性情經歷書之不尙褒揚亦欲彰其故實云爾

吳復初

名介璋江蘇武進人一期畢業留歐最久民元被推爲江西都督經三月卽讓與李烈鈞李其門人也

吁嗟乎吳復初規行矩步長身軀滕王閣下縮兵符講武之暇尊程朱袖出中庸一卷書敷陳義理如貫珠部衆拍手笑招呼吾儕願爲名將不作窮儒高談性理胡爲乎先生翻然悔迂疏大權長揖畀其徒春申江上聊卜居舊使散盡蒼頭奴手提一筐肉與蔬日中將去供庖廚迎面轟然走電車都督雅步不及趨一霎之間血模糊身後不會餘鎔銖吁嗟乎吳復初

沈岑之

名驥江蘇東台人二期畢業不樂仕進亦不事生業家產蕩盡流爲乞丐

吁嗟乎沈君沈君美且都形骸放浪無牽拘經文緯武不在意閒時

祇好吹笙等同學少年半當道沈君鄙視如鼠鼯久益落魄遭揶揄
卑田陋院藏身軀金閨與余遇諸途衣裳破碎形容枯相與攜手歸
吾廬飲以濁酒食以蔬贈以綈袍滌其污勸其翻然盍改圖沈君曰
惡是何言歟爾勿自恃五斗儲爾勿炫耀鮮衣裾方今天下亂若蕪
驚人浩劫來斯須華屋山邱風雲變流離溝壑無賢愚我能三日不
飯不見飢來驅冬日無襦不畏寒侵膚囊橐如罄放行千里無舟車
凡三事爾能乎余曰唯唯否否惟君能之吾不如再贈兼金氣愈麤
掉首出門罵庸奴吁嗟乎沈君真與常人殊

趙百先名聲江蘇丹徒人二期畢業黃花園事敗卒於香港

吁嗟乎趙百先赤其目聳其肩巨口廣額高雙顴早歲結識孫逸仙
放言革命年復年甯粵兩地掌兵權延攬豪傑揮金錢欲建偉業愁
遷延竟效祖生先着鞭一挫再挫心如煎黃花崗畔問蒼天怒氣不
洩胸中填肝腸崩裂生命捐一世烈士真可憐夜夜山頭啼杜鵑吁

嗟乎趙百先

朱興武

名瑞號介人浙江嚴州人三期畢業洪憲初以浙江都督封侯爵晉位興武上將軍

吁嗟乎朱興武上將軍號誰界汝項城稱帝汝不阻坐擁全浙張旗
鼓心如狐疑膽如鼠避凶趨吉徒自苦將軍外觀賜也賢將軍內性
參也魯十萬貔貅氣虎虎無端鼎足分門戶大權旁落令不行蕭牆
禍起誰禦侮子矛子盾忽亂舞迴戈直指將軍府倉皇錯亂不可撫
易服夜走申江浦五載尊榮空臚臚夢繞西冷一杯土吁嗟乎朱興
武

按五十君咏另錄一卷茲載四首

秋夜登涵虛樓

危樓獨倚夜光寒皓月星河亦大觀愛我尋常知我少依人容易用
人難真誠猶恐神明責恩怨能忘宇宙寬俯仰一身如芥子勞勞離
合與悲歡

日蝕

如此驕陽任吐吞
暗雲堆墨壓籬根
泉臺總說無天日
誰識人間晝亦昏

與友人話故鄉

南都不合帝王居
六代紛紛過隙駒
一入繁華金粉地
霸才銷盡變庸奴

半面妝

悄立花前淚萬行
編籬張幕爲誰忙
一春心血銷磨盡
贏得徐妃半面妝

花時

看花時節盼清明
盼到清明愁轉生
愁雨愁風愁驟暖
最難能是半陰晴

偶成

萬斛新愁酒一杯登樓望極獨徘徊天心不解隨人意正欲尋山風雨來

惜春

日日貪歡不問家天涯誰惜嫩年華春心已逐流波去莫對東風怨落花

眼見枝頭褪粉紅百般憐惜總成空飄茵墮溷尋常事忍作無情五夜風

淺白深紅細剪裁和風甘雨費栽培應憐造物非容易莫向人間隨意開

山南山北展晴暄芳杜棠梨雜蕙萱留與行人舒倦眼此花宜玩莫移根

一架薔薇已凋謝幾株芍藥尙含胎勸君莫訝此花晚留待羣花開後開

感懷

王粲登樓動遠情
江淹作賦恨難平
浪高不見孤帆影
風定猶聞落葉聲
雁唳終宵雲路窄
蛩鳴冷壁客愁生
爲誰留滯灘江上
春去秋來歲幾更

亂絲愈理愈紛紜
日日墟頭卯酒醺
甯願乞憐小兒女
未諳長揖大將軍
老懷已共秋容淡
岐路難憑夜色分
已覺南天多瘴厲
會看北塞起風雲

稍存熱念卽忘形
癯向浮生說性靈
萬劫輪迴空往返
一身俯仰太伶仃
藥能療病人無死
酒可消愁我不醒
因果到頭莫趨避
惺惺何用惜惺惺

題畫

極目關河迢遞雁
行飛下汀洲
客子凋裘已敝
遠山殘雪猶留

答錢曉昇問近況

勞君詩意遠懷余羸馬依然駕敝車昔日童蒙驚老醜當前冠蓋盡
生疏不堪客裏償愁償聊學兒時讀舊書午夜寒鷄催夢醒未應重
去覓華胥

題聽月圖

寂寂空庭已四更碧闌干外月華清百蟲不語人孤倚萬籟無聲夜
轉明最惱銅壺殘漏滴幾忘玉臂嫩寒生嫦娥閒到無聊處或者偷
偷話俗情

朱無可三十誕辰詩以贈之

無可無可何人斯丰姿颯爽才不羈問年三十走天下東跨滄海西
咸池文心奇崛詞韻險我欲讀之心膽危問君何故生斯世烽烟滿
地草木披牛羊鬻盡蘭蕙種天爲桂林留一枝無可無可君聽之丈
夫所貴在乘時方今中原正板蕩千鈞寶鼎君能持謝安折屐先破
敵管仲右袵因攘夷扶風高歌慕豪士牖下咕嚕羞伏雌何不揮戈

挽落日何不踏天敲玻璃人間朱顏一霎變鬢髮易被霜雪欺五陵
佳氣正蔥鬱況君本具龍隼姿我年六十神已疲夢回往事心傷悲
我已蹉跎至於此君莫等閒隨我追

李崧老七十誕辰

莫對鄉關喚奈何團圓猶得妥行窩天留老眼觀興廢佛說慈心降
劫魔作畫全憑詩味足清談還見酒顏酡五年以長宜兄事白髮緣
何我轉多

癸未霜降日登七星岩觀紅葉回憶丁丑季秋余出京前十日
尙與朋舊登掃葉樓飲酒賦詩未幾寇氛日逼倉促西征今六
年矣爰憶舊作補錄於此

掃葉樓中聽風雨掃葉樓邊葉飛舞道人掃葉葉更多紛紛忽散還
忽聚道人掃葉何自苦世間萬物皆塵土一霎掃葉被葉埋葉與道
人永終古我今如葉遭飄風知落誰家塞庭戶願君停帚任風吹吹

上畫樓留畫譜

月夜訪劉仲平不遇

秋盡荻花飛探幽過釣磯波搖溪月碎風送洞雲歸紅葉樹已禿江梅香尙微攜筇訪高隱馴犬臥荆扉

題友人富士山圖

景物真堪散客愁長風萬里到瀛洲從來不見青山老富士緣何竟白頭

癸未小雪前二日北風寒甚

天寒季子黑裘凋愁緒難憑濁酒澆爐火灰溫鄉夢穩紙窗風急夜燈搖出門豈復圖安樂避亂何須怨寂寥寇退還家知有日計程終覺路迢迢

歐陽革辛邀飲穿山校舍

革辛邀我飲我酒渴吻一吸三五斗醉後高談忽忘久夜色昏黑風

亂吼草辛留我捉我肘寒宵歸路不可走奇鬼在山賊在藪前車覆
轍君知否我言主人意良厚浮生百年終培塿我比賊窮比鬼醜二
公於我亦何有縱然遭遇事非偶劉伶荷鍤笑身後策杖衝風不同
首路熟何愁山峻陡一時行險雖無咎平生動定毋乃苟望見蓬門
無人守以杖扣之如擊缶同舍人家厭纏糾竊笑此翁困紅友繩床
一覺日當牖拂拂酒香猶在口

石橋眺月

夜靜霜濃月半開石橋西畔獨徘徊波搖碎月隨流去風送寒鐘渡
水來想到興亡成泡幻悟他宇宙亦塵埃故山六載不歸去猿鶴還
應動怨哀

十月十五夜雨

月到圓時偏遇雨雨晴月出夜遲遲不如意事都如此除卻身經那
得知

霜後

經霜老柳葉離披，猶有寒鴉戀故枝。
雲破乍窺星燄閃，月來還見水漣漪。

寒夜梁家席上

十箇八箇馬蹄鼈，三斤兩斤狗頭魚。
何如半畝瓢兒菜，獨占秦淮春雪初。

和嵩老韻

等是有家未得歸，相看白髮已絲絲。
何當黃葉邨前路，爲誦清灘江上詩。

擬小樂府

禍水何人決，傾城亦可哀。
歌風臺已圯，爲築避風臺。

月夜懷封鶴老

良夜不忍寐，案燭自搖晃。
開罇撥爐火，村酒壯詩膽。
北風侵衣袂，皓皓

月惟獨賞歲律忽云暮霜華瘁葭莩高人念我寒清夢或有感

讀擊壤歌

吾讀擊壤歌恨不居上世無懷葛天遠人情漸詭異小盜弄弧矢大盜竊仁義欺人復欺天弔民而伐罪土地與人民皆具魚肉味湯武非聖賢利導乃因勢苟不過桀紂無乃嫌好事秦楚逞干戈漢高獲其利草草三章約泣下父老淚馬上得天下猶欲馬上治一朝失鞭策六龍不按轡紛紛復擾擾白骨已滿地瞻望田與井耕鑿懷夢寐

有鳥

海邊有鳥名精衛啣石年年不辭瘁幾乎不把海填平幻出蜃樓與海市海市從來不易逢偶得見之亦遭際中間景物寧有窮罡風一吹若平地願君望海勿再填填平何處搜奇異盍覓深巢刷羽毛向清波遺糞穢已而而已其返而鳥乎鳥乎何所爲

示門人李蓋忱

浮生何必定華廬丈夫所貴在出處我心匪石不可轉莫怨西山薇
蕨苦蜀道從來不易行行到崎嶇餘勇買方春桃李能幾時晚節黃
花足千古

春日集唐人句

獨奏相思淚滿巾趙嘏此聲腸斷爲何人白居易空花一散不知處

柳宗元流水無情草自春杜牧

行到新都若舊宮李白羅幃繡被臥春風李白時時引領望天末

孟浩然多少樓臺烟雨雨中杜牧

二月江南花滿枝孟雲卿出門何處望京師戴叔倫江山不管興亡事

包信惟有垂楊管別離劉禹錫

楚雲滄海思無窮韋應物重疊青山繞故宮王建上馬出門回首望

令狐楚桃花依舊笑春風崔護

琵琶先抹六么頭王建不到天明未肯休令狐楚惟有啼鵲似留客

半士詞可憐同聽不知愁 韓愈

吳王舊國水煙空 陳羽 何處青山是越中 孟浩然 猶惜道旁歌舞地

崔液 野花黃蝶領春風 王建

黃砂磧裏客行迷 岑參 萬里辭家事鼓鼙 劉長卿 腸斷關山不解說

王昌齡 杜鵑休傍耳邊啼 韓愈

幾行衰淚落烟霞 韓愈 湘浦南遷莫怨嗟 李白 日暮征帆何處泊

孟浩然 少風波處便爲家 杜甫

嫁得蕭郎愛遠遊 于鵠 水流無限似儂愁 劉禹錫 且休悵望看春水

杜甫 人自傷心水自流 劉長卿

不是客迷客自迷 李商隱 踏莎行草過春溪 陳羽 城中車馬應無數

張籍 歌舞留人月易低 儲光羲

百尺高樓臨狹邪 薛維翰 木奴千樹屬隣家 劉禹錫 牆東便是傷心地

劉禹錫 馬踏春泥半落花 賈諷

青山隱隱水迢迢杜牧惆悵回車上野橋羊士諤惟有相思似春色

王維更無消息到如今周德華

悶來無處可思量王建城闕連雲草樹荒韓愈建業烏棲何足問

呂溫天涯一望斷人腸孟浩然

桃李風多日欲陰盧綸地無人迹轉傷心羅虬啣泥燕子爭歸舍

劉禹錫隔葉黃鸝空好音杜甫

紅燭津亭夜見君司空曙居延城外又移軍張仲素千巖烽火連滄海

李白猶自笙歌澈耳聞王建

桃蹊柳陌好經過劉禹錫野草青苔日日多劉禹錫莫道巴陵湖水闊

李白春來不改舊時波賀知章

蒙山和馮振心重九遣懷均

緇塵欲濯覓滄浪老去羞登傀儡場漸覺鬚眉如雪白又驚橘柚帶
霜黃雲迷黑塞猶通夢風咽哀鴻枉斷腸此日欲窮千里目幾忘身

在瘴雲鄉

白雲紅樹也宜人雨後登臨望眼新叢菊似開檀口笑一峯偏蹙黛
眉顰但存灰燼須償債對此山河欲寫真千仞崗頭休拭目卻從何
處避羸秦

愁思如雲撥不開陣鴻飛去復飛來但留忍辱江南井誰見歌風沛
上臺烈烈寒飈吹破帽斑斑紅葉點蒼苔願君收卻新亭淚與我重
溫濁酒杯

東平鄉晚眺

茅舍溪橋暮色侵炊烟冉冉隔楓林菊殘籬落深秋色鳥弄鉤輞空
谷音翠岫千尋遮去路寒一澈洗塵心村翁侶解勞人意沁鼻香
醪淺淺斟

定浦口占

千峯萬壑路高低不見人家見犬鷄行到前山山更窅回看來路已

雲迷

入山容易出山難
破敵何人擬謝安
七十老翁猶負戴
一腔熱淚莫偷彈

十圍老樹臥雲根
入郭千金豈足論
不作棟梁翻礙路
滿身菌耳度朝昏

蠻煙瘴雨黯成圍
狐兔亡羣鳥亂飛
莫爲艱難阻遊興
不探山色不須歸

金秀設治局

如此淳風得未曾
銀環髻髻不須憎
官衙冷似山神廟
走卒忙如行脚僧
野客芒鞋倨上座
泛交伙伴亦尊稱
莫嫌城郭煙塵重
誰料僑山酒價增

金秀贈歐陽革辛局長時蒙山又陷落也

漫憑剝復俟河清
天運悠悠或倒行
事到危疑明素志
地當圍絕出

奇兵騎牛騎虎皆遊戲屠狗屠龍孰重輕且挾泰山超北海歸來差
不負平生

徭山遣懷

愁腸斷盡轉無愁萬里投荒亦壯遊敢以生涯嫌未足嬾將心事訴
從頭珠沈弱水終含媚鋼入洪爐也自柔白髮窮年猶作客費人斟酌
去還留

徭山避寇四十餘日蒙山又告失陷傷哉

覓食饑鷹榛莽間驚弓弱鳥不知還碧湍欲卷泥沙去紅葉猶留血
淚斑已厭兵戎逾八載更衝烟瘴度重關此行苦樂猶居半銷盡輪
蹄看盡山

白晝陰霾黑夜風疑神疑鬼有無中四山野火奔狐兔一片寒砂集
雁鴻太息張巡能割愛誰教許遠亦臨戎賊星方曜猶酣臥端爲天
人未感通

遙區亂山中尋得野梅八株

月落霜寒一夢孤
憐渠瘦損玉肌膚
含情欲向梅花問
不見林逋怨也無

天然潔白不沾塵
絕世丰姿避俗人
路窄山迴風料峭
最高寒處最精神

風滿寒山雪滿坡
一吹玉笛惹情多
幾生修到翻成恨
歲歲寒山伴薛蘿

幾棒香雪有誰憐
着屨尋春野水邊
待得風清雲破處
枝頭還見月娟娟

由金秀至蘿鄉

瘴雨如煙路欲迷
山行緩緩過雲溪
揚鞭亦有題詩意
只恐春泥滑馬蹄

危磴湍流樹作橋
竹筒接水到山腰
何須苦憶江南景
亦有雲山慰

寂寥

鳥語鈞轡韻最清十圍老樹不知名蠻花未必無顏色底事遊人怕

遠行

北客南來語不通傳情會意指西東兩三僇女圍爐坐偷眼看人鐙

影中

樹皮爲瓦竹爲牆紅蜜煎茶桂葉香莫笑耳環如手釧石牌尊大似

君王

一宿荒村百感生倚裝俛火問前程雨聲似有留人意明日高山不

可行

林深難覓野人棲歧路憑誰爲指迷高樹插天翹首望登山又見白

雲低

八年辛苦抵南荒飽看奇山願亦償流水有情如送客潺湲相伴過

蘿鄉

馬練移同和

風塵僕僕只如初山僻難尋下澤車行李一肩猶重累登程又棄半
囊書

能忍須臾心自安崎嶇過盡路塗寬英雄事業原如此上路休歌行
路難

幽居

幽居鎮日掩柴關水自潺湲人自閒燕子似憐春欲暮唧泥猶帶落
花還

同和鄉晚眺

濃雲黯黯壓春山燕子唧泥帶雨還落盡閒花人不見一灣流水掩
柴關

北流嘗鮮荔枝

絳囊一繫夢魂牽瓊樹珠林雨露偏玉局題詩玉環笑天教尤物得

人憐

客中饒吻欲分甘一吮瓊漿興自酣欲取靈根歸去種嶺南何似在

江南

乙酉八月十二日山園聞倭寇投降

聞說休兵喜復悲八年衰鬢已如絲田廬蕪穢眞餘事家室存亡杳
不知亂後生涯空咄咄路遙歸計尙遲遲今宵魂夢翻難穩獨擁孤
衾有所思

虞姬

垓下悲歌氣不揚奈何聲裏對紅妝八千子弟皆塵土留得虞姬姓

字香

昭君

琵琶一曲寄情深胡馬嘶風雪滿襟省識惡圖憐薄命爲君出塞也

甘心

飛燕

不整乾綱怨色迷枉憑庸主說家齊從來洪水猶能治禍水何人自掘堤

綠珠

絕世驕奢石季倫誰憐金谷舊時春低回樓下傷心地十斛明珠誤美人

九月桃花

曾憐春色太匆匆又向清秋露淺紅一夜寒霜花滿地者同休怨五更風

博得花中輕薄名霜前月下更淒清等閒莫嫁陶元亮自寵秋容不愛卿

乙酉臘月十六日塗經東安覆車感而有作

翹首鄉關路幾重猶將鴻雪認前蹤八年艱苦何須問笑指衡陽同

雁峯

當年曾共雁南飛一瞬中原事已非
閱盡興亡頭似雪獨攜藜杖看斜暉

歸來吟

吾讀歸去來淵明真快哉淵明一何快
吾心亦何哀馳驅萬餘路烽火八年災
其室已如燬舊業飛塵埃已拚異鄉鬼
誰料燃死灰昔日思家客今上望鄉臺

到門不敢入卻去問比隣此屋誰爲主
吾家餘幾人鄰叟見余至拭目復凝神
妻孥開荆扉問訊疑不真見面各無語
潛潛淚沾巾持燭肅我入稍稍慰苦辛

索錢兒發笥請浴婦燂湯瘦妾酤良醢
荆妻具黃梁怪我面目改持燭爭相看
須臾隣里至圍我若堵牆共話離亂事
扯雜難具詳話到酸辛處四座淚沾裳

寧家纔十日度歲成兩年初春寒刺骨土竈冷無煙謀生值亂後同
顧心茫然搬薑鼠徒勞羨釣魚在淵同學多不賤或有香火緣下車
學馮婦攘臂奚作焉

纔傳收冀北又賦哀江頭瘡痍正滿目手足猶相離朋黨分門戶宗
彊而比周鼠牙與雀角擾攘何時休衰鬢日侵尋風雨多煩憂爾羊
倍爾牧蹄齧空禾疇

歸家未久聞門人林蔚錢卓倫俱授上將喜而賦此

宿雨初晴愛夕暉飽看山色不如歸玳梁雖朽巢猶在乳燕而今高
處飛

題畫

洛水牡丹湘水蘭移根千里料應難怪囊一破香風起頃刻毫端開
與看

不作高官不愛錢不諳諂吝不驕蹇閒情寄向丹青裏濃染山光淡

染烟

自輓

何處是家鄉
松楸繞北邙
兩行送行淚
一曲挽歌郎
到此藏形跡
憑人說短長
卻愁難久住
夙債未清償

丙戌仲秋過葉蒼之故宅

十年重扣故人扉
惟見寒鴉逐隊飛
閱盡滄桑頭似雪
江東橋畔立斜暉

民國二十六年正月十五夜家庭聚飲余被酒即睡夢中吟一

絕句次早錄出適老友謝劍伯葉蒼之兩君過舍見而不樂
謂有鬼氣恐有客死他鄉之兆時余在京亦不解其意未幾
七七事起倉皇中隨軍委會西遷流離九載幾填溝壑歸而
錄之於卷以志萬里生還之慶而兩君墓木已拱爲之泫然

江南楊柳又春風
獨客生涯生學醉
翁夢到梅花家
萬里五更魂返月

明中

再題富士山圖

富士山前好畫圖爲何一瞬也
榛蕪西風吹醒華胥夢還憶蘆溝風月無

菜園題壁

晚菰早韭應時鮮只用攜鋤不用錢
魚鳳烹龍皆夢幻能甘淡泊卽神僊

寄歐陽革辛

感君推解意纏綿說與妻孥亦淚漣
賜履尙存囊橐裏

甲辰春夫人以布履一雙見惠

及秋寇兵迫桂林余步入搖山大得此履之力

分甘翻占子孫先

明年乙酉余由臨山還平南大旺墟革辛珂里也家中有肴饌或果餌太夫人

輒令其孫輩持盒餉余

雲山經眼縈宵夢鴻雪留題證風緣
風雨聯床應有日相

期翦燭話南天

遲向公不至

碧闌干外雨如烟
青草池邊蛙亂喧
舊約不來花事了
醉拋藜杖枕書眠

流鶯

來去隨心兩兩鶯
偶從園囿寄閒情
嚶嚶不爲娛清夢
自愛濃陰囀數聲

述懷

除卻平生一點誠
別無長處動人情
自慚膽小真如鼠
不敢將身博利名

鶴

嘗聞鶴傲不迎人
白羽翩翩白雪新
不是出羣嫌俸薄
從來仙品本無倫

丙戌仲夏過西華門訪先訥
盒師故宅則已三易其主
後嗣無存焉爲之悲痛

舊曾遊處最關情況是師門心更驚僊蝶已隨莊子化

先生園中有黑蝶一雙極美麗

或隱或現有時飛落襟袖間人無有傷之者頗類燕京太常寺仙蝶先生歿後此蝶遂杳

獨依喬木聽蟬聲

話到酸辛雙淚流倩人指認讀書樓莫嫌景物都非舊弟子重來也

白頭

羞向今生說報恩更從何處賦招魂盆梅碗竹情無限梅已蟠根竹

已蓀

先生課讀之暇見花傭至輒贈松竹棧鞠石菖蒲月月紅等類若干盆遇生徒勤讀或詩文佳者則酌賜一二盆以示獎勵余所得者皆攜歸植之地土久已成樹

何須讀破五車書枉被庸愚詈腐儒交謫聲聲來耳畔先生一笑撚

吟鬚

郊原

策杖啓柴關行行猶卻步久雨初放晴泥滑郊原路花落葉陰陰水漲青溪渡鶯聲一何婉蛙聲一何怒蚓曲幽以微鵲曉朝復暮天籟各隨心節序亦有度沿溪過板橋看山聽瀑布勢若雷霆驚十里猶犇注搏激使之然喧囂非所務物性得其平在此或無數我心如浮

雲悠然自來去回首看斜陽山山罨霧霧

雨花石

雨花石何自來邪相傳生公演妙法闡發祕奧天雨花法會散後香不散取次沁入深泥沙曼陀羅漸化瓊玖不以埋沒生微瑕金陵南出聚寶門岡巒起伏如雲屯舊日經臺今已圯不見高僧見烟水彩雲麗日遮不得映照山石生顏色遊人至此爭剔取有緣得之如拱璧沃以淨瓶功德水艷若新從枝上摘嗟余七十身頽然愛石成癖耽談禪悟到色空與空色欲以花石供佛前石乎石乎心太堅滿身文彩真可憐麝有臍兮犀有角物以炫曜招尤愆況當大地盡烽火慎防玉石俱焚焉愿女以身獻佛故永離塵劫歸洞天石不點頭亦不語自信石壽千萬年

紅白桃花

寂寞無言晝掩門故宮回首黯消魂玉容不斷相思淚灑向枝頭見

血痕

莫因輕薄笑桃花涉世何曾一念差別有傷心人未識玉肌猶帶守

宮砂

冬至後二日夜雪枕上口占

皎皎渾疑夜月明孤衾如水若爲情天邊任作旋風舞簷際全無滴
漏聲忍使山河都變相拚將邱壑盡填平何當斗酒煨爐火煖到心
頭是事輕

贊香樹詩詞稿

秣陵俞鍾彥

鷓鴣天

逝水年華去底忙
秋娘零落褪紅妝
玉樓人散花無主
金谷風來土尚香
淒惻語惱人腸
不如低度賀新涼
曲中愛把哀情訴
唱到酸辛淚滿裳

水龍吟

滿園紅葉爭妍
無端惹得遊蜂擾
禁掩乍歇
清明又到人間
春老狼籍殘紅有誰憐惜
更無人掃
問過牆胡蝶
鄰家春色枝上尚餘多少
遠水含烟一抹
憶江南
夢魂空繞
蘅門晝掩
悽涼院宇悽涼懷抱
鄉國牽愁旗亭送別
可憐芳草
聽鶉啼不如歸去
一聲聲道

高陽臺

客裏傷春愁中殢酒
懨懨帶緩巾斜
小病經旬
芭蕉綠到窗紗
看花已是明年事
怕明年依舊天涯
最驚心鏡裏新添白髮些些
秦

淮何處迎桃葉正烟籠寒水月映平沙舞榭歌臺飄零燕子桃花而
今濕遍青衫淚甚心情重聽琵琶更銷他夢斷魂驚水隔雲遮

甘州

莽天涯芳草路悠悠無限別離愁自龍山春去鷄臺夢斷往事都休
風景依然如昨金粉付東流一曲長亭怨淚灑西州重問白門
消息祇雕欄玉砌長掛心頭甚繁華一瞬冷落幾春秋待重新臨春
花萼恐歸來不似舊時樓斜陽外烟波浩渺空自凝眸

蘭陵王

咏酒

秦淮柳柳下紅樓賣酒拏舟去不醉無歸那管白雲與蒼狗香殘到
王藕拂面金風亂吼漸吹醒幾日酣情強笑青蚨杖頭有杏帘
望夏口縱醉不成歡一杯在手也知身外皆塵垢奈渭城再唱陽關
將出掃愁還待覓敝帶故園莫回首紅友離君久又來到離江
更逢重九無家何處謀諸婦念座客常滿香醪盈斗當年樂事如夢

寐尙憶否

玉樓春

蘭湯浴罷金闌裏
菡萏香濃風乍起
羅衣葉葉軟如烟
秋月娟娟涼似水
四條弦索纖纖指
此調分明何滿子
半牀幽夢酒初醒
一曲淒涼猶在耳

醉花陰

秋柳

山色蒼蒼湖水皺
又晚秋時候
微雨過蘇堤
萍老荷枯景物都非舊
風攔月榭人歸後
昨夜寒初透
無語又黃昏
倦倚西風顚顚腰肢瘦

採桑子

劫灰留得前朝寺
門外雙峯
門內雙松
老衲歸來一笑逢
循牆剔蘚尋碑字
茶鼎茶濃
苔徑雲封
落日西風幾杵鐘

木蘭花慢

算千秋大辱惟南渡宋高宗爲戀湖山美無心恢復有意和戎夢夢
鑄成大錯總甘心半壁主人翁塞外蒙塵誰顧人間清議難容

頑童弄火有何功不戢自逢凶况孤軍深入羣雄環伺師老疲窮茸
茸何堪滋蔓待從頭一一掃兇鋒斫就東溟鯨膾與君痛飲黃龍

一萼紅

與趙紹葵錢曉昇飲於公園

醉扶歸怕蒼苔路滑拂面噤寒風獨秀峯高澤宮人杳猶聞鈴鐸丁
東掃荒徑冷楓瑟瑟甚此日霜葉比花紅邊嶠風光良朋情緒感慨
相同想到故園臺榭有鍾山遠眺淮水潛通幾度烽煙數番風
雨而今黍麥芄芃又爭料客窗孤枕聽今夜疏雨滴梧桐酒醒殘燈
如豆曙色矍矍

長亭怨

寄懷張蘭舫

記當日燒殘蠟炬西窗夜話秋池聽雨舊夢難尋江湖霜鬢已如許
干戈滿地望雲樹傷羈旅漫淚灑新亭問誰是中流砥柱
悽楚

只翠樽解意差慰離人情緒片帆歸去又生恐石尤風阻聽不盡羌
管悠悠空惆悵平陽舊侶算閱盡興亡惟有青山意苦

大酺丁丑重陽前二日洞庭舟中作

正碧雲輕黃花瘦一棹扁舟南涉天涯隨處好任飄零書劍一肩行
篋極目漁邨橫空雁陣隱隱孤城樓堞清歌無人賞只翠樽相伴玉
壺敲缺漸日落長沙湘君何處水天相接西風吹落葉難吹盡
羈旅愁千疊空記省悲秋宋玉作賦蘭成匆匆又遇重陽節夢冷愁
腸結再休想枕衾熨貼况永夜遭魔魔傷時感事老淚盈盈承睫聽
誰渡江擊楫

浪淘沙

黃葉捲蕭颼客路悠悠秋心兩字合成愁冉冉斜陽煙水闊雁影汀
洲莫去倚危樓空自凝眸青山依舊水東流塵滿征衫霜滿鬢
一棹孤舟

大聖樂除夕

瑞腦金爐唐花小几客窗點綴漸黃昏簾影低垂冷逼香篝門外一
天風雪滿引樽前屠蘇酒把萬緒千端都一撇笑談久只莫道今宵
又逢除節 高歌聊解愁絕奈唱未成腔聲已咽聽幾番簫鼓幾
家兒女盡情歡悅驀憶今宵璇闥裏料燈自熒熒花自結飛歸去已
負卻二年離別

瑞鶴仙咏梅

胭脂微淡薄較郁李穠桃又稍高卓黃昏數聲角任霜前月下瓊肌
瘦弱孤山舊約料林逋久厭離索甚天寒紙帳閒眠不管幽芳零落
誰覺香中有韻清不知寒蕭疏自若甘心寂寞丰神獨占林壑
悄無人一片孤邨流水心事憑誰付託謾高歌白雪陽春惹人笑謔

蝶戀花二首

殘醉慊慊心似醉瘦損腰圍總被春愁累淚眼看花花濺淚斜風細

雨千紅墮　樹樹桃嬌兼李媚底事今朝滿目添濃翠蝴蝶過牆
深院閉東風不管人顚顚　　着意尋春春不露霧重烟輕春在空
濛處水遠山長歸夢阻杜鵑休向人前訴　　垂楊又向東風舞裊
裊纖腰唱澈黃金縷乞奏通明春且住羣芳要借春陰護

解連環

狂飈纔息又簷聲如溜暗雲堆墨正惆悵一角危樓聽澈夜瀟瀟何
能睡得無限春情都付與閒愁脈脈料空階嫣紅姹紫沾墮溷泥欲
飛無力　　天涯誰憐獨客問遠遊倦否還念鄉國甚芳訊開到茶
縻更不管春光千金一刻落盡芳菲怕驀地歸來難覓對銅壺漏聲
細數曙光未白

解語花

一春花事盼到清明偏又冷風淒雨杜宇聲聲甚無端喚綠郊原芳
樹流光如許問人在天涯何處願把殘妝留半面慰我傷春苦

水遠山長洞掩往事如煙劉阮憶前度輕薄桃花莫等閒片片盡隨
波去柳眉恁嫵怕新月見時含妒惱恨垂條無氣力猶向東風舞

齊天樂

咏燕

烏衣朱雀今猶在年年斷魂香壘春社纔過清明又到雨雨風風如
晦玉京顚顚任朽盡堂榭飄殘簾葦尙想舊情覆巢破卵總無悔

芹邊時露翠羽看一雙玉剪差池比美漢苑無人秦樓欲暮腸斷
呢喃聲裏啣將花蕊怕落盡紅深難尋芳卉忍放春光匆匆隨逝水

玉樓春

咏柳

重簾不捲春明滅檀板歌殘金縷闋十三樓外雨如煙廿四橋邊花
似雪 一從南浦傷離別舞袖宮腰芳意歇章臺舊夢謾重溫張
緒而今愁萬疊

南樓令

浩月又團圓名花綻合歡奈愁人觸景眉攢願化天邊春社燕尋故

墨認江南 書至勸加餐病餘衣帶寬倚豪門劍缺羞彈獨坐寒
窗思往事剔銀焰到更闌

臨江仙

題費曉樓美人背立圖

顧影真堪絕世避人半是嬌羞蜂腰螺髻儘風流倚欄頻眺遠悄立
獨含愁 憶否妝樓分袂天涯幾度春秋相逢待與話溫柔芳心
猶有恨千喚不同頭

眉嫵

就前題另賦一解

恨晨占夕卜夢繞魂牽佳約總無準謾把愁腸斷真真喚相逢獨步
苔徑迴眸未肯料芳心猶帶離恨最堪念翠袖因風起驚鴻掠秋影
是喜還瞋休問只阿嬌前面少箇圓鏡六曲欄干外徘徊久雲鬢
怎耐清冷憂心耿耿又生恐玉容嬌病但悄立無言已覺幽閑端整

江城梅花引

用費洲漁笛譜韻

庭花落盡雨瀟瀟漲春潮繫蘭橈六曲屏山間煞紫雲簫門掩黃昏

風色峭人去也捲殘紅逐水飄

離魂暗隨香篆銷望青帘邨店

招眉痕淡入青山裏彩筆難描玉枕紗幮幽夢憶前宵爲問月明何處好多只在十三樓廿四橋

綺羅香

咏柳絮

江北江南非煙非霧鎖日意迷神眩慘徑鋪氈一霎香風迴旋纔宵
着碧幌珠簾又飛過野橋邨店最妨他舞態顛狂閒情已倦杜陵眼
斜陽冉冉望極惆悵春歸何處凝眸千遍逐浪隨風寸縷游絲
難縮縱有意捲絮搓棉休想度金針彩線任飄零修到他生化萍仍
點點

好事近

桃花半開喜而賦此

侵曉捲珠簾天氣今朝清明階下靚妝一笑頓眼開神爽

二分

春色最相宜枝上花三兩又恐暖晴烘放祝淡雲留養

鵲橋仙

次金仲如韻

客窗聽雨孤衾憶夢休
閒閒愁深淺春光掉首不憐人
莫浪說東君能挽
落紅成陣隨風逐浪千縷游絲
難綰捲簾燕子未歸來又
怎把黃昏消遣

鷓鴣天 仲雅閱余詞句謂多哀怨之音賦此見意

檀板清歌憶石城
冷窗夜雨夢魂驚
臨風羌管腸吹裂
展卷吳箋淚染成
推玉枕醒微醒
搗箏閒唱訴衷情
流鶯不喜淒涼調
花外教人嚀數聲

意難忘

回首歡場記酒痕
淺暈扇影留香修眉橫黛綠嬌額點宮黃
無意處意難忘聽一曲清商怕等閒春風夜月虛度流光
而今潘鬢如霜但雲收雨歇人去庭荒
新愁凝淚眼舊恨斷迴腸
傾綠醕醒黃梁又換了滄桑
待與伊重尋舊夢夢也淒涼

多麗 和陳誦洛餞使韻卽以奉贈

怪無端灑江水會西流蕩煙埃金樽酒滿醉鄉差勝封侯對青天杯
中日月撐白眼皮裹陽秋如此寰中超然物外目中猶有俗塵不最
難是枚臯暇日詞賦共優游冰心潔泉甘任酌莫問廉州 笑當

年唾壺擊缺而今鋼練初柔憶家山傷懷倦旅欹睡枕厭數更籌舊
好新知都成夢幻煙波何處覓扁舟解人少解人既見心爲解人留
從今後傾懷低首與子綢繆

浣溪沙二首

題黃仲果齋書潤例

品到方時字亦方功深百鍊見純鋼淋漓斗墨煥龍章

上溯宗

風追漢魏中間變體笑鍾王庶幾鹿洞共流芳

黃君方體字與朱子書法大略相似

草聖縱橫勢莫當也如張旭時狂煙雲拂紙任飛揚

指甲傷殘

三度換

君少時學書用力過度右指甲褪落三次

墨池辛苦卅年嘗精神到處顯光芒

徵招用周草窗韻

紅蕖未落西風緊蘭成賦愁時到天遠暮雲飛恨瓊簫音杳故園秋

漸老料松菊已無多少鬪酒餘醒採香殘夢一時驚覺
萬籟寂
無聲平沙遠孤鴻又聞淒調兩鬢已如絲笑黃花簪帽樓高雖信好
問誰識仲宣懷抱憑欄久曠野無人又晚煙殘照

如此江山 辛巳重陽日陰雨

狂飈舞穿庭戶籬邊菊英乍吐三徑就荒重陽又到江海飄零倦旅
荒林獨步但滿眼烽煙一襟塵土遙憶江南故宮蕭瑟盡禾黍
扁舟也歸何處聽寒猿哀雁燈殘夜午露冷蓮房波飄菰米萬里飛
秋杜甫含情欲語問破碎河山有誰能補謾想登高滿天渾欲雨

相見歡

金樽檀板趁斜暉醉忘歸轉眼雨絲風片落花飛
章臺路垂楊
樹夢依依悵恨小園人去掩荆扉

臨江仙 趙紹葵前輩重到桂林喜而有作

記得澤宮池畔酒樽詩卷留連微霜點破嫩秋天柳江帆去穩桂嶺

月空圓

作客正嫌離索重逢倍覺纏綿悲歡離合總前緣放懷

滄海外沉醉落花前

賀新郎

送吳惠範之重慶

春盡芳菲歇憶江南閒愁萬種離腸千結滿汀洲蘼蕪草惆悵晚芳
時節謾聽到曉鐘聲澈濕遍青衫天涯淚料青衫淚點都成血關山
路夢難越斜陽黯黯聽鷓鴣更那堪河梁握手故人長別樽酒
殷勤吳姬勸捲地楊花似雪莫再唱陽關三疊眼底分明人千里問
歸期難計年和月長亭怨聲聲咽

鬲溪梅令

詠牡丹

牡丹端合號花王壓羣芳誰解嬌容只許嫁東皇撩人空斷腸
臨風帶露自飄揚倚新妝莫惱穿梭蜂蝶去來忙誰教花太香

絳都春

葉荅卿任

在桂林重見卽將訂婚

棟風已近恨二十四番匆匆花信燕語夢迴斜倚妝臺慵梳鬢桃花

經雨紅成陣。怨春去、門前誰問芳心脈脈。纖腰裊裊，尙餘風韻。輕迅移根上苑，憶前度、謾把啼痕輕拭。尙想舊情重見，蕭郎良緣分。含情無語，心心印，漸嬌面朝霞淺。暈銷魂玉軟，香溫夜闌燈燼。

月下笛

滴滴嬌嬌，婷婷裊裊，人間仙品。佳期末準，鵲橋遙望，隱隱春風夜月。知多少，謾負卻良辰美景，任山長水遠，雲遮霧隔，寸心先允。日近歡無盡，愛乍喜還嗔，意迷神領。伴推暗引，幾回欲語，還忍晨妝理。罷猶調弄，又笑與檀郎傳粉，對菱鏡，倚香肩，競賽芳容倩影。

望湘人

自七雄輩出，五霸迭乘，中原戰壘相望。總說爲民爲民，何事盜蹠夷齊難判。惹起貪嗔，居心竊國，包藏禍患。謾侈談釣黨，鋤奸都想競登彼岸。我亦眼花撩亂，望白雲蒼狗，霎時變幻，把青史翻殘。是是非非，誰管此言誅紂，彼言易暴，橫議有何成算。但只合兒戲相看，莫

爲古人腸斷

賀新涼秋螢

照眼眞蕭索。問今宵、胭脂井畔，嫩涼何若。夢到青青池塘草，那識前身命託。漸露冷、練裳嫌薄。渡柳穿荷淒涼意，把平生形影都忘卻。愁逐隊，近谿壑。星流扇小偏難捉。最驚心、纔黏綉幌，又飛池閣。月下燈前無光彩，惟見花陰閃爍。只恐被西風吹落。爲戀移盤銅仙液，映秋墳、夜永心情惡。天欲曉，夢難覺。

滿江紅

回首當年耽詩酒，牢愁萬斛。沉醉後，浩歌長嘯，撫摩髀肉，欲掃羣山空眼界。誓掀滄海成平陸。到而今、熱血冷如灰，身名辱。塵拂面，泥緇足。家國事成棋局，嘆光陰一去，鬢絲難綠。浪跡江湖成底事，那堪更向新亭哭。問誰能、獨手挽乾坤，金甌復。

浪淘沙

題畫美人

梳掠下妝樓花見應羞輕顰淺笑總溫柔擬摘幽蘭憐並蒂袖手凝眸
柳外月如鈎鈎起新愁天涯底事任勾留如此良宵空過了
說甚封侯

臺城路 閨門人買寶峯綺羅香詞不覺技癢爰賦此解

歡情深淺空猜度天涯望穿雲樹舊約難憑新愁惹起荏苒年華虛
度淒涼院宇怕老卻紅香問春何處幾顆珍珠慰情怎解寂寥苦

銀燈長夜自守恨關山路杳難罄離緒試卜歸期相逢有日待把
郎心細數敲窗暗雨但斜倚薰籠倦調箏柱莫儘撩人柳邊鶯燕語

附覃寶峯綺羅香詞一首

恨欲浮空腸偏宛轉枉說心中幽素待寫殷勤淚墨謾催佳句
愁永夜被冷誰溫守孤燈豆紅偷數念羈情衰柳低眉銷魂空
憶江南路晨妝樓上望極煙銷征帆隱約幾番認誤墜葉
飄殘院落又驚風雨待雁影嫩約難憑似鶯聲喚人愁住空念

我翠袖開情夢闌雙燕語

中華民國三十六年九月六日初版

著作者 俞 鍾 彥

校對者 蕭 珉
吳 超

發行人 郭 湘

印刷者 藝海美術印書館

無錫城內中山路

